

2025-mut Ilassutitut aningaasaliissutitut Inatsisissatut siunnersuut (Aningaasaqarnermut Akileraartarnermullu Naalakkersuisoq)

Saqqummiussissut

Siullermeerneqarnera

Manna Naalakkersuisut sinnerlugit 2025-mut Ilassutitut aningaasaliissutitut Inatsisissatut Siunnersuut saqqummiuppara. Inatsimmi atuuttumi ilassutitut aningaasaliissutit Aningaasaqarnermut Akileraartarnermullu Ataatsimiititaliamit akuersissutigineqartut ukiumoortumik ilassutitut aningaasaliissutissanut inatsimmi katersorneqassasut allassimavoq. Taakkulu ukiumi aningaasanut inatsiseqarfiusumi tullermi Inatsisartut upernaakkut ataatsimiinneranni oqaluuserineqassapput.

2025-mut Ilassutitut Aningaasaliissutitut inatsisissatut siunnersuut taamaalilluni aningaasaliissutitik atorineqareersunik aningaasaliinertut isigineqassaaq. Ilassutitut aningaasaliissutitut inatsimmi aalajangersakkat aningaasanut inatsimmi oqaasertaliussatigut piginnaatitsissutit malillugit ukiumi aningaasanut inatsiseqarfimmi 2025-mi kiisalu Inatsisartut Aningaasaqarnermut Akileraartarnermullu Ataatsimiititaliaata akuersineratigut Naalakkersuisut aalajangeriigaat pisortatigoortunnngortinneqarput. Tamatuma saniatigut Inatsisartut namminneq aningaasaliissutaanni ilassutitut aningaasaliissutit Inatsisartut Suleriaaseq pillugu Ataatsimiititaliaannit akuerineqartut ilaapput.

2025-mut Ilassutitut aningaasaliissutit inatsisissaannut siunnersuut ilanngussaq 1-eqarpoq, tassanilu aningaasaliissutit allannguutai 2025-mi akuerineqartut ersillutik, ilanngussaq 2-qarlunilu tassani 2025-mut oqaaseqaatit allannguutai akuerineqartut aamma ersillutik.

2025-mut Aningaasanut inatsit kiisalu 2025-mut Ilassutitut aningaasaliissutitut inatsisissatut siunnersuut ataatsimut ukiumut aningaasanut inatsiseqarfimmut 2025-mut ataatsimut aningaasaliissutit inerneraat, 2025-mullu Nunatta Karsiata Naatsorsuutaanut aallaaviullutik. 2025-mut naatsorsuutitigut kisitsisit 2025-mut Nunatta Karsiata Naatsorsuutaani takuneqarsinnaassapput.

2025-mut Aningaasanut inatsit IST-mi 122,1 mio. kr.-nik amigartoorfiunissaa, IS-imilu 130,1 mio. kr.-nik amigartoorfiunissaa missingersuusiorneqarpoq. Missingersuutitut Naatsorsuutinullu inatsit malillugu aningaasartuutit qaffasinnerpaaffissaannut sanilliukkaanni, tamatuma kingorna 0,9 mio. kr.-t suli aningaasartuutigeqqinneqarsinnaapput.

2025-p ingerlanerani ilassutitut aningaasaliissutitut akuerisat IST-p inerneranik 4,3 mio. kr.-nik ajorseriartitsipput. Ajorseriaat pingaarnertut ilassutitut aningaasaliissutitik Inatsisartut Suleriaaseq pillugu Ataatsimiititaliaata ilassutitut aningaasaliissutitik 4,1 mio. kr.-nik akuersinerata malitsigisaanik pivoq. IST-p inernerata taama ajorseriartinneqarneratigut, 2025-

mut aningaasartuutit annertunerpaaffissaat malinneqanngilaq. Aningaasartuutit annertunerpaaffissaasa 3,4 mio. kr.-nik qaangerneqarnerat matumani pineqarpoq.

Ilassutitut aningaasaliissutissatut siunnersuutip matuma kingorna ukiumi aningaasanut inatsiseqarfiusumi 2025-mi IST-mi 126,4 mio. kr.-nik amigartooruteqarnissamik missingersuuteqarneq kiisalu IS-mi 134,4 mio. kr.-nik amigartooruteqarnissamik missingersuuteqarneq kinguneraa.

Taamatut oqaaseqarlunga Naalakkersuisut 2025-mut Ilassutitut aningaasaliissutinut inatsimmut siunnersuutaat Inatsisartunut kajumittumik suliaasangortippara.